

巴陵縣志卷之三十

摺據

怪力亂神聖人不語以其非理之常也若夫登
記載之書滋見聞之廣雖理之所無安見非事
之所有彼神降石言鵠飛星隕麟經具詳則知
聖人所不語者有防微之意焉所必錄者有炯
戒之意焉摺異志奇固春秋外傳例也況乎君
山靈異洞庭誦怪變幻靡常取而書之亦鑄鼎
象物使民知神姦意耳又豈徒薜蘿山鬼續離
騷之餘也乎作摺據

巴陵縣志

卷之三十

摺據

摺地

凡十
二條

洞庭寰宇記云洞府之庭也荆州記太湖亦有洞
庭潛通君山故得名耳三茅君云天無謂之空山
無謂之洞人無謂之房山腰空虛是謂洞庭人頭
空虛是謂洞房由斯以言洞庭視寰宇之說亦暢

矣

出雅俗
稽言

湖水水經云廣五百里日月出沒其中大抵湖上
舟行雖泝流而遇順風加之人力自旦及暮可行
二百里巴陵西到華容過大穴漢汴湖一日程又
西到澧江口鼎州江口皆通大穴漢赤沙三日程

南至沅江過赤鼻山湖四日程又東至湘江迤
石青草湖兩日程夏秋水漲其道如此冬春水
往往淺澁江道廻曲或遠或近雖無風濤之患而
常靠閣出岳陽風土記全唐詩話云洞庭湖詩許棠題後
無繼者僧齊已駐錫巴陵欲吟詩竟未得意有都
押衙蔡姓者戲謂已公曰題洞庭湖者某詩絕矣
諸人幸勿措詞已公堅請之押衙抑揚朗誦曰可
憐洞庭湖恰是三冬無髭鬚原注湘江北流至岳陽達蜀江夏潦後蜀漲勢高過在湘波讓而退溢為洞庭湖濶數百里秋水歸壑湖底漸出唯一條湘川而已此言其不成湖也

巴陵縣志

卷之三十

君據

二

巴邱岳陽風土記巴邱亦謂之巴陵關江記言羿
屠巴蛇於洞庭積骨為陵淮南子曰斬巴蛇於洞
庭今巴蛇塚在州院廳側巍然而高草木叢翳張
燕公有登巴邱望墨山之詩兼有巴蛇廟在岳陽
門內太守歐頴廢之

洞庭夾湖之中央沐日浴月吞雲吐霧合九江之
水統數千里溪洞諸流匯為巨浸范記稱朝暉夕
陰氣象萬千已得其梗概而孟襄陽之涵虛混太
清杜少陵之乾坤日夜浮二語可謂洗盡塵滓形
容入妙矣出許鶴沙東還紀程

洞庭山浮於湖中下有金堂數百間玉女居之四
時聞金石絲竹聲徹於山頂楚懷王時舉羣才賦
詩於上云瀟湘洞庭之樂聽之令人難老雖咸池
九韶不得比焉每四仲節王常繞山遊宴舉四仲
之氣以爲樂章王好進妍雄羣賢逃越屈原以忠
見斥隱於沅湘披蓁茹草不交世務採栢實和桂
膏以食被王逼逐乃赴清冷之水其神遊於天河
精靈時降湘浦楚人爲之立祠漢末猶在其山又
有靈洞采藥者入之明如燭照行十里迥然天清
霞耀花芳柳暗丹樓瓊宇壯麗異常有衆女霓裳
冰顏麗質與世人殊邀采藥者飲以瓊漿金液奏
以簫管絲桐餞令還家贈丹醴之訣其人還鄉見
邑里人戶皆非疇昔尋得九代孫問之云遠祖入
洞庭山采藥不回今已三百年矣出王子年拾遺記
黃金潭巴邱縣有黃金潭莫測其深古有釣於此
潭獲一金鎖引之一船有金牛出奮踴躍而還潭
因此名出幽明錄

白泥窖在洞庭湖中長十餘里水淺不及尺舟過
膠泥中螺蚌碎石與艦板相軋聲刺刺不休非猛
風不能過水涸時人力推挽數里之地行一二日

者有之篙頭綴橫木形如卜字其銳者一入
不能復出人以為神窖

出許鶴沙東還紀程

紫荆臺在澧湖岸有江叟遇樵夫遺以鐵笛吹之
無聲一日登白鶴山吹於紫荆臺響震林谷忽有
女子出授神藥曰服此當為水仙子蓋龍女也

出紀勝書

布袋口洞庭一湖合九江五渚之水奔趨於此稍
下則三湘之水西南一帶支流匯為東湖西向入
口與九江水合流過岳州至城陵磯入於岷江實
有括囊之象其名俚其義確也

出許鶴沙東還紀程

巴陵縣志

卷之三十

括披

四

扁擔洲洲地客山高主山隱伏不甚利土人而僑
居多與葺者俗謂之扁擔洲

出岳陽風土記

巴陵隱磯隋號州刺史崔仲方獻平江南之策云

水路要害必爭之所須巴陵隱磯置船屯聚水經
注江水過下雋縣北與湘水會匯為洞庭而得巴
陵其隱磯則又東也此皆沿江要害所必守者先

命屯之然則巴陵當為雄鎮矣

出乙丑郡志

岳城洞門城東門脚下舊有洞門名濱陽門每于
自開一扇人以為水驗崇正元年兩扇俱開水到

漫城內官為拜祭乃瀟

出丙寅郡志

據人

凡七
六條

鄭德璘巴陵令貞元中任湘潭尉家長沙每歲省親江夏曾遇老叟鬻菱芡者璘挈松醪春飲之一日涉洞庭將赴江夏有鹺賈韋氏女美艷夜與鄰舟女知詩者同泊鄰舟女聞江舟有秀才吟所作拾芙蓉詩云物觸輕舟心自知風恬烟靜月光微夜深江上解愁思拾得紅蕖香惹衣鄰舟女取紅箋書之置韋女奩中及旦分舟去德璘自江夏歸適與韋舟同宿洞庭韋女於水窻中垂釣璘見而悅之以紅綃題詩曰纖手垂釣對水窻紅蕖秋色

巴陵縣志

卷之三十一

摭據

五

艷長江既能解佩投交甫更有明珠乞一雙戲投之惹其鈎女拾之珍重繫臂愧無所報遂以鄰舟女所書紅箋投之已而韋舟張帆先發遭風沒於洞庭德璘聞而悲惋爲弔江姝詩二首曰湖面狂風且莫吹浪花初綻月光微沉吟暗想橫波淚却共鮫人相對揮洞庭風軟荻花秋新沒青娥細浪愁淚滴白蘋君不見月明江上有輕鷗詩成醉而投之遂感水神持詣水府府君曰德璘曩有義相及且異日是吾邑明宰不可不曲活此女查同溺輩問誰爲鄭生所愛有王者揆臂得紅綃府君命

攜韋女送璘舟時已三更璘覺有物觸舟秉燭探之乃韋女繫臂紅綃尚在遂納爲室後璘當調遷謀醴陵令韋女曰不過巴陵耳璘曰何以知韋女曰昔水府君已言之矣璘果遷巴陵使人迎韋女舟至洞庭逆風挽舟見一老篙工卽水府君也韋氏拜謝府君以詩書韋氏巾曰昔日江頭菱芡人蒙君數飲松醪春活君家室以爲報珍重長沙鄭德璘書畢而去璘詳詩意方悟卽昔日鬻菱芡者歲餘有崔希周投詩卷於璘內有江上拾芙蓉詩因知韋氏所投德璘紅箋詩是希周所作耳

出楚風補

巴陵縣志

卷之三十

摭摭

六

馬希範後唐莊宗滅梁楚馬殷遣希範修貢莊宗問洞庭廣狹對曰車駕南巡纔堪飲馬耳莊宗嘉

之出五代史

許棠有洞庭五言詩時人謂之許洞庭

出丙寅郡志

沈光有洞庭樂賦韋岫曰此一岸官商也

出丙寅郡志

滕子京左遷巴陵重修岳陽樓落成郡僚問落成如何曰痛飲一場憑欄大慟十數聲而已後卒於

官出通志

楊大方岳州人好學負氣紹熙中赴試於江陵道中過一廟衣冠入謁擲案間盃琰詔決得失

許時已被酒遂取玦毀之將惡部判官鬚大聲叱責引足踏仆之乃去纔出門闕蹶移時起謂僕曰酒之累人如此吾適入廟侮神被二卒追詣庭下神詰責甚峻賴善部力爲分解謂此子爲醉所誤未宜置之重罰就令充惡部使神首肯我必不免索紙作家書授僕投筆而逝

出夷 聖志

吾邦使君汪安行以禮守移攝巴陵歸任道由安鄉阻風禱於黃山寺夢烏巾紫襪者來謁云詰朝可行異日吾邦使君也敢不告既寤風果息解舟去秩滿還朝仍任禮守紹興改元乃書其事於朝

巴陵縣志

卷之三十一

出通志

君山父老戴呂夜泊君山忽一舟至有老人自稱湘中老人吟云湘中老人讀黃老手披紫藟坐碧草春至不知湖水深日暮忘却巴陵道呂異其詩就之復不見按一統志載呂筠鄉嘗遇老人於君山索酒數行亦歌此東坡云此詩詞始是李謫仙輩老人蓋真遜世者

異記

洞庭廟祝杜雲隱黃陂人洞庭廟祝龍知水面風波與人語輒驗江湖廉訪使伯顏上其事於朝至元十六年十月勅封普惠廣化真人提調沿江諸

廟事

出通志

岳州助教宋祥符中封祀泰山按禹貢荆及衡陽
惟荊州包匭菁茅遣使遍求至沅江者民王皓年
踰八十能辨其茅一莖三脊芬芳殊甚奉勅賜王
皓雙帛擢授岳州助教其茅遂成額貢亭曰楚貢
每歲於亭內拜獻春祀秋嘗備供王祭焉

出元王儒真楚

貢亭

記畧

張舉宏治間知岳州居官極清苦蔬食布袍夫人
嘗令人置漆楪數席一日宴客設之張驚曰此楪
何處來夫人云某衙借用後再設張曰此楪如何

巴陵縣志

卷之三十

招旗

八

久不還夫人不得已吐實張怒毀其器送夫人還

鄉

出丁酉舊志

醉叟不詳其姓字以其常醉呼曰醉叟常遊岳郡
冠七梁冠衣繡衣高顴潤輔修髯便腹望之如悍
將年五十餘手提一籃盡日酣沉百步之外糟風
撲鼻不穀食惟咬蜈蚣蜘蛛癩蝦蟇等物市兒爭
握諸毒以供輒喜有侮之者漫作數語多中其陰
事口常念萬法歸一一歸何處二語人詢其故終

不對公安袁伯修召而飲之深信其異

出袁宏道醉叟傳

漁翁卓彥恭嘗過洞庭月下有漁舟過其旁卓呼

問有魚否應曰無魚有詩卓喜曰願聞老人鼓
徐去高吟曰八十滄浪一老翁蘆花江上水連空
世間多少乘除事良夜月明收釣筒欲邀之不可

及矣出明一
統志

鄧廷瓚為方伯時善醫雖小吏有疾必親診視及
為中丞善奕雖士彘知奕者畧崖岸接之以是周

知蠻徼要險出丙寅
郡志

彭學本萬歷間以糧務繫岳郡獄值郡大旱言於
獄吏曰我能致雨吏白於守召之令致雨神并觀
運雷法俄而堂上吼然陰雲蔽署有神現一足鞞

巴陵縣志 卷之三十 九

長丈餘隨登臺披髮約三日後大雨屆期果驗有
妖虹亘天語守借劍斬之西向麾劍落於縣之長
壽堰後有人拾得之出丙寅
郡志

謝登之尚書初赴嘉靖庚子鄉試遊洪山寺題詩
有幾年聞說洪山寺今日來登第一峰之句是秋

果掄元出丁酉
郡志

據事凡十
六條

洞庭樂北門城問於黃帝曰帝張咸池之樂於洞
庭之野吾始聞之懼復聞之怠卒聞之惑出莊
子

君山酒君山上有美酒數斗飲之昇仙漢武帝聞

之齋居七日遣樂巴將童男女數十人求得之水
進御東方朔竊飲之帝怒欲殺之朔曰使酒有驗
殺臣亦不死無驗安用酒爲帝笑而釋之又咸通
中王廓自荆渚將過洞庭泊舟君山登山而行見
石窪中有酒掬而飲之陶然以醉自此無疾漸厭
五穀

出博物志及庚
穆之湘州記

〔競渡〕屈原以五月望日赴汨羅土人追至洞庭不
見湖大船小莫得濟者乃歌曰何由得渡湖因爾
鼓櫂爭歸競會亭上習以相傳爲競渡之戲其迅
楫齊馳櫂歌亂響喧振水陸觀者如雲諸郡率然

巴陵縣志

卷之三十

摺據

十

出隋
書

〔作粽〕屈原五月五日投汨羅水楚人哀之至此日
以竹筒貯米投水以祭漢建武中長沙區曲見一
士人自云三閭大夫謂曲曰聞君常見祭甚善但
常年爲蛟龍所竊今若有惠當以楝葉塞其上以
絲纏之此二物蛟龍所憚曲依其言今端午作粽
其遺風也

出續齊
諧記

〔呂仙畫像〕宋時滕子京守巴陵時有道士投刺云
回巖客自稱華州回道士風骨聳秀滕知爲異人
置酒高談密令畫工圖其像口占詩以贈之云華

州回道士來到岳陽城別我遊何處秋空一劍
回大笑而去次日召之不見矣出東軒記

洞庭怪異湖南馬武穆王巡邊舟至洞庭暴風忽
至浪如連山見波中蛟螭出沒雲霧昏濛有如武
夫執戈戟者有如文吏具欄簡者有如捧盤盂者
徘徊伺候閃爍睚眦莫知何物左右大駭衣服器
皿悉投之舟人欲以姬妾為請王不聽移時風定
僅獲存焉數年王薨出通志

渡江馬順治七年庚寅市人見兩長人騎白馬渡
江人爭目之飄然而去莫知其異出乙丑郡志

巴陵縣志

卷之三十一

摭據

十一

守洲船洞庭每冬必有舟涸於渚間百千人移之
不可動須俟來歲聽其自流謂湖神出巡勅令守

洲其舟子夜宿舟中輒聞風濤激湍檣楫如飛曉
仍涸於故處如此者為吉徵賈客尤利之移舟之

日視其式造小舟獻於廟以酬神出吳聞錄

岳陽圖書周必大在京師茶店具紙畫岳州圖譙
樓上十二時牌亦時時自換神筆也出夷堅續志

和州載艦天祐中淮師圍武昌杜洪中令乞師於
梁梁與荆方睦乃諷中令成納帥師救之納欲親

征乃造一巨艦三年而成號曰和州載艦上列

宇司局衙府皆備又有齊山截海之名壯麗
成泐性驕飾非拒諫一切斷自己意幕僚俯仰不
敢措一詞惟孔史日楊源贊成之舟次君山吳師
焚之泐竟溺死軍士潰散先是成姓郭名禹改名
曰泐泐水內也和州之敗蓋前定矣

出瑣言

書傳匾字汪濤字山來工書少時販米楚中偶至
一寺見殿上集衣冠十餘輩聚沙成字徑丈曰岳
陽樓山來笑謂曰是可以墨書何艱於入法乃爾
耶衆驚愕曰郡守延入署煮墨一缸山來以碎布
蘸墨書匾上頃刻成字守歎賞之囑山來書款曰

巴陵縣志

卷之三十

摺據

十一

海陽汪濤書至今樓屢修而此匾不易

出嘯虹筆記

言符祥徵明初一道人題岳陽樓上曰宋玉塚開

天子出杜康臺側狀元生後世廟出於郢邸任亨

秦生於襄陽皆符其言

出雅俗稽言

祖來宅稅岳陽井邑舊皆瀨江郡城西數百步屢
年湖水激齧今去城數十步即江岸父老相傳今
江心舊闔闐也瀨江砂磧地尙有稅絹甚重去祖
來宅稅北津舊去城角數百步今逼近石嘴蓋荆

江日激而南湘江日激而東也

出岳陽風土記

君山神夢建昌進士黃鉞言其祖履中無子禱於

岳州君山廟夢神以彩籠盛五色鳳三別以筠籠盛一鳥併投之後正室生三子皆擢第妾生一子無所能出通志

築白荆隄宋慶歷間巴陵白荆隄壞與築方畢有

大鯉躍於潭役夫烹之食者皆中毒死出風土記

書韓氏詩巴陵韓氏希孟魏公琦之後嫁賈尙書

子璽元兵破岳州韓被掠以衣帛書一詩投於江

而死長興州判沈思安嘗托劉元履丐趙松雪為

書其詩元履諾而未言一夕夢一婦人云趣為我

求書庶因大人君子之筆發摠幽憤松雪聞而異

巴陵縣志

卷之三十一

招掖

十三

之乃為之寫一通歸之於沈出兩山墨談

披神凡十一條

洞庭君女儀鳳中有儒生柳毅者應舉下第將還

湘中取道涇陽見婦人牧羊於道畔怪問之泣曰

妾洞庭君少女嫁涇川次子夫婿樂逸為婢僕所

惑被黜至此聞君將還吳密邇洞庭欲以尺書寄

托侍者洞庭之陰有大橘樹鄉人謂之社橘舉樹

三發當有應者語竟引別東去毅乃訪於洞庭依

婦言俄有武夫出波間引入靈虛殿取書以進洞

庭君泣曰老夫之罪使閨闈孺弱遠罹誦害哀咤

良久左右皆流淚君驚謂左右曰無使有聲恐公
塘所知毅曰錢塘何人曰寡人愛弟也昔爲錢塘
長令今則致政矣曰何故不使知曰以其勇過人
耳昔堯遭洪水九年乃此子之一怒語未畢而大
聲忽發有赤龍長萬丈餘雷霆激繞其身掌青天
飛去俄擁紅粧一人回君笑謂毅曰涇陽之囚人
至矣乃宴毅於凝碧宮洞庭君弟錢塘君曰涇陽
之妻欲求托高義世爲賓親毅以殺其壻而納其
妻於義不可肅然以謝明日辭歸遂娶於張氏張
亡又娶韓氏旋亡徙家金陵復娶盧氏經歲笑謂

巴陵縣志

卷之三十一

諸事

十四

毅曰妾卽洞庭君女也感君之恩誓必求報泊錢
塘季父論親不從悵望成疾值君異娶不終卜居
於此遂得報君之意開元中與同歸洞庭莫知其

跡

出真
初志

嚴官神姊垂拱中太學進士鄭生長發銅駝里渡
洛橋聞橋下哭聲察之見一女蒙袖泣曰我孤養
於兄嫂惡常苦今欲赴水矣生憐之載與同歸號
曰汜人能誦楚詞九歌招魂九辨之書擬其調爲
怨辭嘗撰風光詞曰隆佳秀兮昭盛時播薰綠兮
淑華歸故里

里一作室

莫與處尊兮潛重房以飭姿見

雅雅一作雅態之韶華兮蒙長譎以為幃醉融光兮渺

渺瀾瀾迷千里兮瀟烟媚媚一作媚長陶陶兮暮熙熙

舞嫋娜之穠條兮嫂盈盈以披遲醅遊顏兮倡蔓

卉寂流倩電兮石髮髓施生居貧汜人嘗出輕繒

一端賣之有人酬以千金歲餘生將遊長安一夕

謂生曰我湘中鮫宮姊譎而從君緣滿當與君訣

去後十餘年生兄為岳州刺史上巳日生從兄登

岳陽樓張宴生偶感愁思吟曰情無限兮蕩蕩洋

洋懷佳期兮屬三湘聲未終有畫艫浮漾而來中

為綵樓高百尺其上帷帳簾櫳彈弦鼓吹中有一

巴陵縣志

卷之三十一

揚城

十五

女起舞含嚙形類汜人歌云沂清風兮江之隅一作

誦音春拖湘波兮長綠裾荷拳拳兮情未舒匪同歸

兮將焉如舞畢歛袖凝望須臾風波遂迷所在沈

亞之補其詞題曰湘中怨出楚風補元王惲湖中後怨

序云至元十八年十月按事順德晨起讀沈下賢

文集偶賦此或云鄭卽子春也詩曰洛橋曉月光

朦朧彼姝嬌啼橋水東鄭生蚤發與之遇挈去媵

御甘長終霧縞烟縠已懔况九歌招魂皆楚風一

朝謫滿與鄭訣云是妓姊非凡庸岳陽樓高花映

紅滿筵歌舞鮫人宮海風吹散歛不見倚雲望入

湘江空

南嶽神彭城劉山甫中朝士族也父官嶺外侍從
北歸泊舟青草湖登岸見有天王祠廟宇摧頽香
火不續因題詩曰壞牆風雨幾經春草色盈庭一
座塵自是神明無感應盛衰何得卻尤人是夜夢
為天王所責因云我非天王南嶽神也主張此地
何為見侮俄而驚覺風波暴起殆欲沉溺遽起悔
過壞詩稿風濤始定

出通志

康公神康應字保裔三世為宋臣死王事廟祀開
封明圓通釋無相領帖南還過廟謁之禱於神請

巴陵縣志

卷之三十

摭據

十六

神而歸時岳大典寺宇人率喜施捨皆云夜嘗夢
康公所促故不敢後功訖夢神曰汝工既畢吾舍
當典可即茅栗坪為基後遂建廟所禱輒應民間
至今奉敬不衰

出通志

永府仙女揭曼碩未達時遊湖湘間一夕泊舟洞
庭攬衣露坐忽中流一權通舟側中有女子儀容
甚雅揭與談論皆世間恍惚事且云妾與君有夙
緣非同人間淫奔者迨曉謂揭曰君大富貴人宜
自重因留詩曰盤塘江上是儂家郎君閒時來喫
茶黃土作牆茅蓋屋庭前一樹紫荆花明日揭阻

風盤塘鎮行數步見一水府祠所設像與夜中女子無異後揭官至翰林侍講學士

出楚風補

曾城夫人開寶中賈知微遇仙者曾城夫人於洞庭歌曰黃陵廟前青草春黃陵女兒茜裙新輕舟短棹唱歌好水遠山長愁殺人歌畢而去

出乙丑郡志

雷部國史云祥符中岳州玉仙觀火惟留一柱有

謝仙火三字趙康靖見聞錄云歐陽永叔言永州一亭為火燬獨存一柱柱根下倒刻三字云謝仙

火好事者問何仙姑曰雷部兄弟又有云係夫婦

岳陽風土記載祥符八年華容老子祠雷震其楹

巴陵縣志

卷之三十一

攝撈

十七

上有倒書謝仙火三字入木跡分零陵何仙姑曰

謝仙雷部火神也兄弟二人各長三尺好以鐵筆

書字字高下與身等後滕子京摹刻岳陽樓上元

豐二年樓火土木碑碣悉燬盡此三字無少損按

此事與歐陽永叔所記小異大抵永叔恐得之傳

聞而記言與國史近實又筆談云世傳湖湘間雷

震有神書謝仙火三字於木柱上所謂火者疑著

隊伍若干為一火耳此說火字又異並存之

雨工柳毅遊涇陽遇婦人牧羊道畔自言洞庭龍

女毅問牧羊何用女曰非羊也雨工也問何為雨

工曰雷霆之類也毅復視之皆矯顧怒步飲齧其
異而大小毛角則無異羊焉

出李朝威柳毅傳

龍女愛文許漢陽名商汝南人貞元中舟過洪饒
間遇風尋小浦避之行三四里至一處竹木森茂
亭宇壯麗有二青衣雙髮若鵝素面如玉迎舟而
笑許悅之登岸投謁青衣延入見庭前池中荷菱
芬芳虹橋兩道傍一閣白金書額云夜明宮青衣
引入閣見女郎六七人貌若天仙許具述來歷女
郎云客中一宵亦有少酒願供歡飲閣前花萼滿
樹青衣捧一鸚鵡置欄杆上甫一鳴百花齊放每

巴陵縣志

卷之三十

摺據

十八

花中現一美人長尺餘歌舞盡態俄頃頓滅女郎
出一卷示許覽之乃江神賦令許讀之並請自讀
又出感懷詩一章曰海門連洞庭每去三千里十
載一歸來辛苦瀟湘水嗣取諸卷帖請許錄之卷
中皆有人名押署有名仲方有名王者有名朝陽
者許擬和韻書卷中女郎曰不可此卷歸呈父兄
不欲雜耳俄而青衣促許退恨恨而別及曉視之
但見空林而已解纜行至昨遇風處岸人云昨曉
遭風溺死四人二更後湧出一人微有氣而似醉
救活之乃言曰昨夜海龍王諸女過歸洞庭宿於

此取我輩四人作酒幸客少不多飲我故得免許

問客為誰曰一措大耳不記姓名但記青衣云許

娘子苦愛人間文字嘗欲得窮措大以供談論許

追憶其事及感懷詩皆可驗歸舟覺腹中膨脹吐

出鮮血數升三日方平始知所飲皆人血耳出集異記

水神廟前有客泊湘妃廟前夜半偶不寐見輿衛

入廟中置酒數盞心悸不敢窺迨明方散隱隱絕

水浮空而去因入廟中見詩四句墨色猶未乾其

詩曰碧杜紅蕖縹緲香水深潭月弄新涼峯巒向

曉渾相似九處堪疑九斷腸出許彥周詩話

巴陵縣志

卷之三十

招撫

十九

楠木神洞庭湖白泥窖下有楠木窖舟行過此黑

風濁浪舟子驚相耳語翦牲焚楮色甚惶恐見神

木直逼舟傍遙望過船遇之船破賴賈筏得救舟

子色稍定乃曰此楠木神每遇暴風晝晦輒出游

湖中神首色沉綠如螺髻往來於神木窖之前後

左右終古於斯稱神木云出許廣涉東還紀程

掃帚神有商人甌明過青草湖湖神邀歸問所須

有一人私語曰君但求如願不必餘物明依其言

湖神許之及出乃呼如願是一少婢也至家數年

遂大富後歲旦如願起晏明鞭之如願鑽入糞帚

中明家漸貧故今歲旦糞帚不出戶恐如願在

中也

出按
神記

誠感湖神韋騶者明五音善長嘯自稱逸羣公子
舉進士不第遊岳陽太守以親知見辟數月謝病
去有弟騶舟行湖洞庭騶乃痛哭水濱移舟湖神
廟下欲焚其廟忽假寐夢神曰幽明之途無枉殺
者公先君嘗爲城守方剛讜正鬼神避之撤淫祠
甚多不當廢者有二神訴上帝初不許固請十餘
年乃許與後嗣一人謝二廢廟之主故賢弟當之
茲當送屍湖上騶驚悟往尋果獲弟屍於岸是夕

巴陵縣志

卷之三十

摺據

三

又夢神語曰鬼神不畏忿怒而畏果敢以其誠也
君今果敢如是吾所以懷畏昔洞庭張樂是吾所
司願以至音酬君厚惠所冀觀咸池之節奏釋浮
世之憂煩也忽睹金石羽籥鏘鏗振作騶甚嘆異

曲終乃寤

出廿
澤謠

神迎詔使乾隆四年鹿邑中翰梁遂以詔使過洞
庭風雨中見一長髯人紗帽藍衣氣度閒雅乘一
物似馬半沒水內侍者持杖舁輿隨其後與波上
下舟中數十人共見之相距纔數武逆風而行良
久不見其年八月梁返棹過齊安與商邱宋榮言

之或曰此洞庭君迎詔使理或然也

出筠齋偶筆

摭仙

凡十條

龍宮僧唐嘉州任自信住湖南持金剛經典元十

五年過洞庭湖有異物如雲冒舟上俄失自信久

之乃凌波而出云至龍宮謁龍王念經賜珠寶數

十事有僧附一信屬至衡岳觀音臺付昭真師言

是汝和尚送來令傳金剛經自信至南嶽訪僧果

云和尚滅度五六年矣

出報應錄

呂仙笛橘齋史右丞夙病眉瘤初至館樓上夢仙

拭面而瘤脫既覺往謁呂仙亭物色如所見平章

巴陵縣志

卷之三十

摭摭

三十一

忽刺解夫人禿滿倫氏患頭風日夜望仙禱祈已

而聞笛聲皆曰仙笛也公曰仙有靈當再聞及夜

笛聲起牆外自是夫人起居如初

出鄭元璧呂仙亭記

杜仙女名蘭香邑有漁父於洞庭之岸聞兒啼聲

四顧無人維三歲女子在岸側漁父憐而舉之十

餘歲天姿奇偉容貌姝瑩殆天人也忽有青童自

空而下攜女去臨昇謂其父曰我仙女杜蘭香也

有過謫人間會期有限今去矣其後降包山張碩

家授以舉形飛仙之術碩成仙去漁父亦學道不

食後不知所之

出壩城仙錄

樊夫人名雲英上虞令劉綱妻也綱素有道術
治尚清靜簡易民受其惠無水旱疾毒之傷樊亦
潛修密證遂皆白日仙去唐貞元中湘潭有一媪
鬢翠如雲肥潔如雪策杖曳履日可數百里在湘
十餘載常以丹篆救疾鄉人敬奉之一日告人曰
吾欲往洞庭救百餘人性命爲我設船一隻里人
張珙具舟楫送之將至洞庭前一日有大風濤撼
一巨舟觸於君山島上舟碎百餘人露宿於島有
白鼉游沙上數十人殺而食之明日有物如城圍
島白如雪島上人忙怖叫號勢甚急岳陽人亦遙

巴陵縣志

卷之三十

括據

三十一

觀雪城莫能曉也媪舟至岸遂飛劍刺之聲如霹
靂雪城遂崩乃一白鼉長千餘尺蜿蜒而斃劍立
其胸遂救島上百餘人忽有道士來與媪遇甚相
慰悅珙詰其故道士云劉綱眞君之妻樊夫人也

出貞元
遺事

周生逸其名唐太和中廬於洞庭君山時以道術
濟吳楚人多敬之後將抵洛途次廣陵舍佛寺有
三四客來時方中秋霽月澄瑩且吟且望有說開
元時元宗遊月宮事因相與嘆曰我輩塵人固不
得至其所矣周生笑曰某嘗學於師亦得焉且能

挈月致之懷袖因命虛一堂翳四垣不使有纖隙
且告客曰我將梯取月去聞呼可來觀乃閉戶久
之忽見天地曠晦俄聞生呼曰某至矣客因開其
室生日月在某衣中耳舉其衣出月寸許一室盡
明寒入肌骨客拜謝曰願收其光因閉戶其外尚
晦食頃方如初也

出通志

江叟善吹笛槐上有神教往荆山求鮑仙叟如其
言得遇鮑仙贈以玉笛吹之有龍來迎去成水仙

出列仙傳

華州道士列仙傳呂巖字洞賓蒲州人得雲房之

巴陵縣志

卷之三十

括據

三

道隱顯變化多遊衡岳湘鄂間岳陽風土記巖嘗
留題岳陽樓云朝遊北海暮蒼梧袖有青蛇膽氣
麤三醉岳陽人不識朗吟飛過洞庭湖宋王綸守
岳州時來謁自稱華州回道士綸問世系巖曰世
系不必問所請教者奕棋耳綸素號國手與奕連
負問其籍巖吟曰仙籍班班有姓名蓬萊仙客呂
先生凡夫肉眼知多少不及城南老樹精綸訝之
轉瞬已失嘉定己巳鍾仲山自金陵罷官歸舟次
巴陵南津港俄見一舟中有黃襖翁二青衣童侍
側熟視仲山良久俄失所在翌日仲山往呂仙亭

拜禮真像果衣黃有兩青衣童侍側貌與昨所見
肖仲山感悔無已周星作水調歌頭詞有更似南
津港忽遇呂公船之句乾道中衲衣髻髮竹笠草
履行乞於市乘醉過州西南橋值喬守出犯前行
喬怒而執之道人曰吾醉矣喬命下獄詰旦引問
道人亦無言賦詩曰暫別蓬萊海上遊偶逢太守
問緣由家居北斗星杓下劍掛南天月角頭道我
醉來真箇醉知他愁是怎生愁相逢何事不相識
却駕白雲歸去休書已乘雲冉冉而去喬憮然始
知爲呂仙也

按呂巖唐進士爲德化令於廬山遇鍾離真人授天仙劍法得九九數號

巴陵縣志

卷之三十

招樵

二十四

純陽子省志本岳陽風土記云河中府人唐呂渭之後會昌中兩舉進士不第所載互異今備存之

洞庭老人不知名氏賈客呂筠卿常於仲春夜泊
君山命酒吹笛數曲忽見一老父掉舟來於懷袖
間出笛三管其一大如合拱其次如常人所蓄其
一絕小如細筆管筠卿請吹之父老曰大者諸天
之樂不可發其次對洞庭諸仙合樂而吹其小者
是老身與朋儕可樂者試爲子吹之不知可終曲
否言畢抽笛三弄湖上風動波濤滉漾魚鼈跳噴
五六聲君山鳥獸叫噪月色昏昧舟人大恐老父
遂止

出刊異志

城南穉松呂仙曾於岳陽城南題詩云惟有城
老樹精分明知道神仙過至建炎中松猶存紹興
二十三年大風拔樹無數此松遂枯有道人適至
折已仆一枝插於旁咒曰彼處難安身移來這裏
活自是日以暢茂郎今穉松也道人蓋呂仙云

出夷

堅志

廳西青衣山人劉方元自漢南抵巴陵夜宿江岸
館中籬西一廳尚扃鎖二更後月色滿庭江濤不
驚忽聞有家口嘯咏之聲一老青衣曰往年阿郎
貶官時命老身常騎偏面騮抱阿荆郎墜損左膊

巴陵縣志

卷之三十一

摺摭

三五

至今天陰酸痛明日必大雨今阿荆郎高官也不
知知有老身否昔日阿荆郎愛念青青河畔草今
日亦頗謂綿綿思遠道也明旦果雨壁上有詩墨
色甚新其詞曰爺娘送我青楓根不記青楓幾回
落當時手刺衣上花今日成灰不堪着視其詩非

人間語也

出博異志

賣酒姥姥善採百花釀酒王方平嘗以千錢過蔡
經家與姥沽酒後有人經洞庭湖見賣百花酒者

卽姥也

出龜臺琬琰

降乩仙城南有請仙者乩忽自運大書云余劉聖

臣康熙時人住硃砂橋方冠郎卒無嗣妻何氏栢舟自矢余季父屢欲奪其志氏誓不二天投繯幾絕以母救得免事姑孝十七年如一日奈族散湮沒請入志以光泉壤淋漓奮迅扶乩者手腕幾脫時嘉慶八年二月晦日也後廸訪里中譏老云硃砂橋左划船塘昔爲士族劉姓故居譜系有學步聖賢等派學古聖臣諸人名頗著後式微遠徙夫籛孝攸關允宜闡揚但事屬乩傳未便遽登列女門中附摭於此正非執尸頭之筆描變相之圖爲鬼作董狐也

巴陵縣志

卷之三十一

摭

三六

摭釋

凡八條

陸法和梁承聖初侯景遣其將任約伐湘東王法和時在江陵詣湘東乞討約召諸蠻入百人又遣胡僧祐千餘人同行登艦大笑曰無量兵馬江陵多神祠人常祈禱自法和軍出無復一驗人皆以爲神從行故也至赤沙湖與任約相對法和乘輕舟不介曹順流而下去約軍一里遠命將士攻之縱火舫於前風逆不便法和以羽扇麾之風勢急反約衆皆見梁軍步於水上大潰投水約逃竄法和曰明日午時當得及期人問之法和曰吾前於

此洲水乾建一刹語檀越等此雖爲刹實是賊標
今何不自標下求賊也如其言果見約在水中抱
刹仰頭纔出鼻遂擒之法和後人齊爲太尉無疾
禮佛坐繩床終殮入棺尋開視不見出北史

睦禪師洞山初法嗣住乾明寺僧問昔日靈山記
今朝嗣阿難師曰楚山突兀漢水東流曰任心麼
則洞山的嗣也師曰聽事不真喚鐘作甕出乙丑郡志

無姓一統志居巴陵縣東南楞伽北峯足不出闔
者五十年唐柳琮爲之記按省志以爲柳宗元誤
於唐得無姓於元得無相兩和尚甚不偶也
舊志止載無相而遺無姓今考前說補之

巴陵縣志

卷之三十一

摺據

三七

無相名普實蜀夔人圓通寺僧誕夕白光燭室泰

定三年五月五日有異僧過門因話心包太虛聞

之忽省如夙契年十一出俗攜錫遍歷禪席嘆曰

大丈夫不越出三界毀形何益由此節飲食脇不

沾席七日豁然頓悟云如人飲水冷煖自知自洪

武初南遊荆湘衆迎居圓通寺陞座演法天花飛

墜仙鶴翔空長沙旱迎實祈禱舟次龍祠祈風說

偈遂感神助四百里程未竟日而至祈求三日果

大雨一日示其徒曰幸未正月初二日吾當歸及

期沐浴端坐說偈而逝

出統志

灝鑑雲門偃法嗣受具於靈徹分任乾明寺嘗持
三轉語酬學者疑問今乾明寺有三轉軒及其墓

塔元學士虞集銘 出乙丑 郡志

徧奕字眉伯黃岡人汪姓襁褓多病八歲博涉羣

書遭明季之亂皈身空門了徹禪旨順治十三年

由百丈源分任乾明寺修灝鑑之業或問獼猴不

進圈時如何打師云也跳不出遠近僧衆宗之當

事延開法席於君山於是興復崇勝古刹晚會綏

遠大將軍蔡毓榮助建大雲寺移居焉緇流推爲

洞宗三十一世燈

出省志附錄郡守諸保宥請住持君山破伏以徧界春風冰洋

巴陵縣志

卷之三十

摺據

二十六

露溪山之中流夜棹月明見天地之心遙看十

二螺青諦聽一聲椎白恭惟和尚青原嫡派百丈

親嗣七載新開久勞鹽醬千年舊業時打葛藤陽

春之曲既高消夜之鐘亦冷凡諸具眼鮮不回心

茲者洞庭八百奇觀君山十一福地昔時名刹曾

建法幢此日山靈徒存梵刹雖娥英之篲管如故

而佛照之柳栗蒸傳幸遇吾師移來此寺深慚某

等幾負茲山然而宦海雖深骨亦帶蓮花之氣但

以清瀾未涸口難吞棘栗之蓬謹卜良辰祈宣妙

法傳書井邊之橋歷歷家珍朗吟亭畔之松明明

祖意應度者宰官居士巴陵道上誰家竈裏無煙

可憐者外道波旬青草湖邊盡是水撈月不提

正令曷掃邪蹤欲翻騰百劫狐身請跨跳三天驢

腳伏願兩堂竝喝不妨賓主分明一棒重拈莫惜

婆心太切徵阿難之覺海萬字從宵開梵志之迷

雲兩花放手庶高峯鼻孔摸著半邊而道吾手頭

變破一指儼然

鷲嶺親到龍潭

朗雲乾明眉伯衣孫雪鑑法嗣後居白鶴山瀘湖

寺登堂說法有云陰陽未判父母未生主人爲甚麼處僧徒皈依有語錄三卷

一如君山崇勝寺僧雍正五年七月武陵客船遭風沉於湖僧偕其徒樸園操舟往救凡十三人留寺數日贈資使歸客環泣曰感師出我於魚腹還求脫我於囹圄僧訝問故僉稱領販鱈賈汪師桂鹽引今失鹽課一千五百餘金歸必不免僧勉慰之令歸九月水落募善泅者覓得竹箱封扁甚固馳送武陵十三人已就獄月餘矣汪啟鑰封識如故乃白縣省釋諸人縣義其事通稟人告時巡

巴陵縣志

卷之三十一

摭摭

三十九

撫趙宏恩給五蘊真空額以表之

摭物

凡二十一條

湘祠斑竹舜南巡不返歿葬於蒼梧之野堯之二女娥皇女英追之不及至君山慟哭淚下沾竹竹

盡斑

出述異記

君山鸚鵡隋開皇九年吳興柳歸舜自巴陵泛舟遇風吹至君山維舟登岸循小徑行四五里與醜越溪礮忽道傍有大石表裏洞徹周六七畝上生翠竹圓大如蓋高百餘尺葉曳白雲森羅映天清風徐吹戛戛作絲竹聲石中穴一樹高幹茂蔭花

徑尺色深碧異香成煙有鸚鵡數千丹雘翠衣尾
長二三尺翱翔其間各相稱呼故有武遊郎仙郎
阿蘇兒者又有自在先生踏蓮露鳳凰臺戴蟬兒
多花子亦有能歌者音調清麗見歸舜忽呼曰阿
春看客忽一青衣乘雲而下相見出迷異記
神鴉巴陵鴉甚多土人謂之神鴉無敢弋者唐張
裕送韋整尉長沙過洞庭詩風帆彭蠡疾雲水洞
庭寬木客題蔬束江鳥接飯丸杜工部詩迎棹舞
神鴉皆是也周氏篆云神鳥在岳州南三十里羣
鳥飛舞舟上或撒以碎肉撒以豆粒食暈者接肉

巴陵縣志

卷之三十

摭摭

三

食素者接豆無不巧中如不投以食則隨舟數十

里衆鳥以翼沾泥水汚船而去此其神也

出岳陽風土記

〔蜃樓〕康熙六年洞庭君山側見蜃樓有城郭樓臺

之狀人物牛犢無一不備八年復見順流至城陵

磯二十三年四月二十五日復見有小山十二及

樓閣寶塔旗幟之屬自申至酉乃滅

楊維鳳君山蜃樓詩序云

會聞海市歲現蜃樓圖經後爲盛談貴士譜之音律若洞庭者八百里神奇億萬斯變幻鮫綉有館閣以延賓在事雖然於今絕響庚戌夏五望九申酉百川方至微雨浸淫偶極日汪洋洲起中流層樓疊湧坊額鋪金旌竿曳彩戶牖洞開浮屠沒觀者如堵既有象之可求宛在中央覺漸以漸息水天一色嵐翠千端市人喧傳水泛山來遠

者默識色從空有夜半潮生五色光華夕照平林
已移海汝於蒼梧欲等人間於天上兼之上秋赤
沐噴民間出因徇故季春石礎餽官舍食果阿誰
奇不絕書事堪並誌莫致而致怪不爲怪君山靈
物郡侯既見其所見三異
瀕仍野人又聞其所聞

寶鏡長安任中宣家畜寶鏡識者謂是三代物後

有籀篆八字云水銀陰精百鍊成鏡詢所得云商

山樵者得之石下後中宣南過洞庭風濤洶然因

泊舟夢一道士赤衣乘龍詣舟中言此鏡乃水府

至寶世出有期今當歸我中宣因問姓氏但笑而

不答持鏡而去夢回視篋中已失所在

出龍城錄

湖蚌洞庭湖中舊有巨蚌其大如半席深夜側立

巴陵縣志

卷之三十一

諸據

三十一

一殼乘風往來烟波間中吐巨珠與月相射漁者

百計取之終不可得

出岳陽風土記

江鼉唐開元中燉煌李鷓爲邵州刺史挈家之任

泛洞庭泊舟登岸因鼻血舐沙上江鼉舐之幻爲

鷓形繫鷓於水中將其妻子抵任州人亦不能覺

數載郡邑大旱召江西河沙道士葉靜祈禱靜能

浮山赴水朝過洞庭忽見沙上繫一人詢之則鷓

也具以狀對靜書符帖巨石上石卽飛起空中鼉

方擁案晨衙爲巨石所擊復其本形時張說爲岳

州刺史具奏送鷓補官今舟行相戒不瀝鼻於波

中以此故也

出獨異志

人魚崇正六年夏漁人曬網忽有魚似人形手

皆備自河上岸

出乙丑郡志

象猪崇正六年癸酉邑民家豕產象育之名曰象

猪

出丁酉郡志

金印宋紹興中洞庭漁人獲一印方二寸紐有連

環四兩兩相貫上有大環總之漁者以金競而訟

於官辨其文乃壽亭侯印四字疑必關公所佩也

出省志

石刻巴陵漁人於洞庭湖中得一石刻詩即鮫室

巴陵縣志

卷之三十一

摺據

三十一

園寶草龍堆隱白沙之句持問諸作者云老杜過

洞庭詩但末聯雲山千古疊底處上仙槎二句為

少異耳

出宋類苑

人面鳥康熙十六年有大鳥人面集於郡學宮壁

立如人越時飛出城外忽不見

出丙寅郡志

捲旗花湖賊楊么為岳飛所破兵皆散捲旗插野

後遍地生花如捲旗之狀因名

出通志

娑羅樹巴陵縣南有寺

丙寅府志載圓通寺

僧房牀下忽生

一木隨伐隨生旬日勢凌軒棟道人移房避之木長便遲但極晚秀有外國沙門見之名為娑羅也

彼僧所憇之蔭常著花細如白雪元嘉十二年生

一花狀如芙蓉

考西陽雜俎天寶初安西道進娑羅枝狀言臣所管四鎮有拔汗羅

最為密近有娑羅樹特為奇絕不庇凡草不止惡禽聳幹無慚於松栝成陰不愧於桃李近官拔汗那使令採得前件樹枝二百莖如得托根長樂擢穎建章布葉垂陰隣月中之丹桂連枝接影對天上之白榆

靈芝草雍正六年十月晦日城南玉霄宮雷祖閣

香案上產靈芝六莖五色繽紛一時稱瑞

白鶴茶滄湖諸山出茶謂之滄湖茶李肇所謂岳

州滄湖之含膏也今惟白鶴僧園有千餘本土地

頗類北苑一歲不過一二十兩土人謂之白鶴茶

巴陵縣志

卷之三十

摺據

三

味極甘香

出岳陽風土記

黃藤草本草綱目名鉤吻亦名野葛野或作冷地

名也廣人謂之胡蔓草又曰斷腸草生嶺南者花

黃生滇南者花紅滇人謂之火把花岳州謂之黃

藤集解云野葛葉如葛赤莖大如箭而方黃包苗

為鉤吻根名野葛葉如柿其根新採者皮白骨黃

宿根似地骨皮嫩根似漢防已中毒者飲冷水即

死稽含南方草木狀瓠菜似落葵而小治野葛毒

取汁滴野葛苗即萎死世傳魏武帝咬野葛至尺

應是先食此菜也巴邑多養生民間有隙輒輕生

誣陷嘉慶八年有男女俱食而死者邑令陳玉五
案視心憐恨之諭各里殷實家收買黃藤以絕毒
根并作樂府一章云掘黃藤絕根莠長鑿非不利
釋鑿而晞齋戒沐浴祇告靈祇我掘黃藤何如爾
弗生爾之所生佳莫如稻菰然必藉人力時而壽
時而耕嗟我婦子終歲不得寧惟彼黃藤誰播種
遠被岡阜近及田塍縣令官職卑況我已暮齡可
以告皇天害人心不萌爾何生此草毒我蚩蚩氓
春秋焚祝帛跪拜獻犧牲我愧蒞此土不能覺愚
癡掘黃藤告靈祇

巴陵縣志

卷之三十一

摺據

三

橘薪洞庭以種橘爲業者其利與農畝等宋政和
元年冬大雪積尺餘河水盡冰橘皆凍死明年伐
而爲薪取給焉葉少蘊作橘薪以志其異

出研北
雜志

〔土餅〕乾隆三十三年邑大水歲荒米貴城外七里
山有土色淡紅細如粉人爭掘之和糠麩爲餅以

食呼爲觀音土

〔考〕雲南志臨安府有落容山其土
香美可食〔論語撰考〕云武當縣

巖岸土色鮮黃可噉〔紀聞〕云開元二十八年懷州
武德縣期城村婦人遇老父紫衣白馬告以渠傍
上佳可食村人取之拌麵爲餅食甚香遠近競取
渠東西五里南北十餘步土並盡由是觀之土竟
有可食者但歲當荒歉
殆亦飢者易爲食耳

〔湖〕昭潭山下有寒泉水深不測名曰昭潭諺曰

昭潭無底橘洲浮昔人覆舟於此沉其銅甌甌有銘詞後於洞庭湖得之疑有潛穴相通耳

出錄異紀

鐵牛岳陽樓下左側有鐵牛一蹲踞西望而張其口若有吞湖之意思亦五行剋制之理與滇省銅

牛制水之義同

出許鶴沙東還紀程

據言

凡七條

洞庭佳味洞庭天下大觀騷人墨客搜奇者尤衆如水涵天影濶山拔地形高四顧疑無地中流忽有山鳥飛應畏墜帆遠却如閒皆見稱於世然莫若孟浩然氣蒸雲夢澤波撼岳陽城則洞庭空曠

巴陵縣志

卷之三十

摺據

三五

無際氣象雄壯如在目前至杜子美則又不然吳楚東南圻乾坤日夜浮不知少陵胸中吞幾雲夢也

出西清詩話

巴陵樂府舊傳臨江仙一闋滕子京所作其詞曰湖水連天天連水秋來分外澄清君山自是小蓬瀛氣蒸雲夢澤波撼岳陽城帝子有靈能鼓瑟淒然依舊傷情微聞蘭芷動芳馨曲中人不見江上

數峯青

出岳陽風土記

岳陽樓詩楊慎云予昔過岳陽樓見一詩云樓上元龍氣不除湖中范蠡意何如西風萬里一黃鶴

秋水半江雙白魚鼓瑟至今悲二女沉沙何處可
三閭朗吟仙子無人識跨鶴吹簫上碧虛視其姓名則元人張翔字雄飛作不知何地人也出楊慎丹錄

三洲歌商客數遊巴陵三江口往還因作歌三首

云送歡板橋灣相待三山頭遙見千幅帆知是逐風流風流不暫停三山隱行舟願作比目魚隨歡

千里遊湘東醴醪酒廣州龍頭鎗玉樽金鏤碗與

郎雙杯行出古今樂錄

巴陵漁父歌唐張志和漁父歌曰青草湖邊月正

圓巴陵漁父棹歌連鈎車子掘頭船樂在風波不

巴陵縣志

卷之三十

招掖

三六

羨仙出乙丑郡志

湘女繫臂詩明季沅陵縣城南杜女名小英被賊

掠去投水死逆流而上至洞庭有詩十絕以油衣

裹之繫於臂云家園一別已經春此日含羞到漢

城忽下將軍搜括令教人尙敢惜餘生骨肉徑辭

弟與兄依人千里夢常驚歸魂願返家園路報與

雙親已不生遮身猶是舊羅衣夢入瀟湘何日歸

遠涉風濤誰是伴深深遙覩兩靈姬少小叮嚀盡

閣時詩書曾托母兄師濤聲夜夜悲何極猶記挑

燈讀楚詞當年畫閣惜如珍何事相隨逐水濱寄

語雙親休眷戀入江猶是女兒身征帆又說過雙
姑掩淚深深怯夜烏葬余漁江波底沒不留青塚
在塵區厭聽強兒帶笑歌幾回腸斷嶺猿多青鸞
有意隨王母空教人間設網羅生平負節欲留題
身入狂瀾嘆不齊河伯有心憐薄命東流直送洞
庭西影照江干不勝悲永辭鸞鏡缺雙眉朱門空
教成秦晉死後相逢總不知圖史當年講解親殺
身自古欲成仁簪纓雖愧奇男子猶是王家共事
臣按明詩統僅載一首丙寅府志亦止載二首
今考沅陵志備錄之貞烈之言不容淹沒

洞庭君詩感柳毅寄書贈以詩云大天蒼蒼兮大

巴陵縣志

卷之三十

摺據

三七

地茫茫人各有志兮何可思量狐神鼠怪兮薄社
依牆雷霆一發兮其孰敢當荷貞人兮信義長令
骨肉兮返故鄉永言慚愧兮何時忘出楚
風補

錢塘君詩洞庭君弟贈柳毅詩云上天配合兮生
死有途此不當婦兮彼不當夫腹心辛苦兮涇水

之隅鬢鬢風霜兮雨雪羅襦賴明公兮引素書令
骨肉兮家如初永言珍重兮無時無出楚
風補

柳毅詩感洞庭錢塘贈什酬以詩云碧雲悠悠兮
涇水東流傷嗟美人兮雨泣花愁尺書遠達兮以
解君憂哀窵果雪兮還處其休荷君和雅兮盛詩

蓋山家寂寞兮難久留欲得辭去兮悲綢繆風雅

〔杜子美詩〕吳楚東南坼乾坤日夜浮董斯強曰或

疑洞庭楚地何遠及於吳考荊州記君山在洞庭

湖中上有道通吳之包山今吳之太湖亦有洞庭

山以潛通君山故得名或疑乾坤日夜浮有似咏

海考水經注洞庭湖圓廣五百里日月若出沒其

中又拾遺記洞庭山浮於水中方知杜句所云皆

是緊切洞庭一語移動不得出省志

〔米元章詩〕瀟湘八景圖有總序散序復有跋曰余

購得李營邱圖拜石餘閒遂景撰述主人以當臥

巴陵縣志

卷之三十

摭據

三六

遊對客即如攜眺其江天暮雪曰篋笠無踪失釣

船同雲漠漠黯江天湘妃獨對君山老鏡裏修眉

已皓然不即不離移易他處不得山梅村詩話

論曰昔左氏春秋內外分傳莊子南華內外分

篇厥後子史多做其式蓋內者書之正文外者

文之餘緒也自來志乘或有雜紀或有志餘或

有攬拾雖無分於內外大要皆正文所不能盡

而以補綴其所不及非盡稗官野史之文也夫

聖人作易不嫌豕塗鬼車之辭詩人祖述不諱

帝武元鳥之異晉魏宋元諸書兼載鬼神并詳

帝武元鳥之異晉魏宋元諸書兼載鬼神并詳

僧道天地之大何者不有苟事足資考鑿文
傳掌故珥筆者又烏能畧之今纂邑志自輿圖
迄事紀凡二十一門宏綱鉅典規模大備而碎
玉遺珠未嘗不與正文相輔雖怪怪奇奇之事
茫茫冥冥之語折衷舊聞咸本載籍首據地至
據言分爲八類殿於編終蓋所以收攝全書非
徒博異實以補遺觀此者謂之東陵外志可也

